



Tir Yimiyim

www.tiryimiyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimiyim@gmail.com

TAPAK 10 Yangia anidakangma : Tir Yimiyim tiryimiyim@aolima tir yimiyim TAPAK 7

Shishilembar kati Sreejesh nem
sen crore 1 agütsütsü nangzük

Defence Ministry-i NSO group den
senotsü magütsütep: Ajay Bhatt



VOL. XVIII NO. 297 (ADOK 297) DIMAPUR

SANGTENNÜ (TUESDAY)

LUROI (AUGUST) 10, 2021

₹ 5.00

COVID-19 Nagaland: 81 dak putet & 60 taneptsü angu

Kohima, August 9, 2021 (TYO): Hombarnü Nagaland nung nisung 81 dak COVID-19 putet aser parnok züngsema nisung ajak agi 28,709 kümogo.

"Tanü nisung 81 dak COVID-19 aliba putet. Parnokji Dimapur o Mokokchung nung tertenetnet (17), Zunheboto nung 13, Kohima o Tuensang nung ter kaka (11), Peren nung 7, Wokha nung 4 aser Wokha nung 1," ta Integrated Disease Surveillance Project atema State Nodal Officer, Dr Nyanthung Kikon-i ashi.

"Hombarnü COVID-19 puteta alir nisung 60 taneptsü angu. Parnokji Kohima nung 33, Dimapur nung 14, Mokokchung nung 9 aser Peren nung 4 lir. Parnok züngsema taneptsü angur 25,906 kümogo" ta paisa metetdaksü.

Nagaland nung COVID-19 nungi taneptsü angur 90.23% lir aser tang nisung 1,397 anepaludar, ta Dr

Kikon-isa ashi.

"Tang tashi nung COVID-19 alitsü akok ta temolung melemi bilemba sample 278,628 tendangogo. RT-PCR ajanga 104,193, TrueNat ajanga 70,065 aser Rapid Antigen Test ajanga 104,370 tendang" ta Dr Kikon-isa metetdaksü.

Deobar tashi nung Nagaland nung nisung 630,407 nem COVID-19 vaccine indang dose 788,602 agütsüo" ta State Immunization Officer, Dr Ritu Thurr-i ashi.

Vaccine agirtemji frontline workers 60,829, healthcare workers 15,984, arishi küm 45 ser temapur 187,881 aser arishi küm 18 nungi 44 tsüingda alir 365,713 lir, ta paisa ashi.

"Vaccine agirtem rongnung nisung 158,195-i dose anaprong agiogo. Parnokji frontline workers 41,056, healthcare workers 12,589, arishi küm 45 ser temapur 104,120 aser arishi küm 18 nungi 44 tsüingda alir 420 lir" ta Dr Thurr-isa ashi.

Dimapur nung kin 5-i NCD ketdangpur shimba magizüker

Dimapur, August 9, 2021 (TYO): Dimapur nung kin 5 hoho nungi tirti kümsük 2020-2024 atema Naga Council Dimapur (NCD) ketdangpur tasen shimba atema ashishiteper.

NCD indang constitution nung lateta aliba ama pei pei kin Hoho temi shimba councillor tem molungtepa Nomination/Selection Committee ajanga ketdangpurtem selection/ nomination/ election asür.

Iba inyakim ya NCD tentetba nungi inyaka aru saka tang NCD indang selection system nung ibaji meinyak aser miim tebilemba nung ajemdaker kin kar nungi Councillor tem magizüker, ta Pomai Hoho, Dimapur tir, Mao Hoho, Dimapur, Tangkhul Hoho, Dimapur, W/ Chakhesang Hoho aser Rengma Public Organisation, Dimapur tirti sangdong ka nung metetdaksü.

Külen, NCD-i August 8, 2021 nü parnok den kin 15 dena lir ta sangdong ka agütsüba aitsür kechiyong iba ya tiyazü kuli lir. Kin 19 nungi 14 maden aser timi angateteptsü atema inyakertem nem senden nung adentsü osang magütsü aser mejaok. Iba ajanga NCD ketdangpur tasen shimba ya tim mesüi inyakba ta jungkai adoka sayur, ta parnokisa metetdaksü.

Iba onük atema Ao Senso Telongjem Dimapur (ASTD) tiri telemsa adokdakja inyakba atema sasa bilemer. Pai telok ana tsüingda tiyongtsü nung inyakba ka ama sayua Naga kintem ashioksüo. Telok anati MOU ka nung sign sütep aser iba nung ajemdaker okadak benoka aliba ken o meyipa agi, saka ASTD tiri acha-ayanga MOU sign asüba dak alia mapa kuma meinyaker, ta kin 5 hoho tirtemisa ashi.

Naga nung kintem rongnung kanga dang tejaklen aoba kin nungi tir kati iba ama mapa inyaktsü meimla aser sasa bilemer. Anungji ASTD tiri MOU sign asüba atema pa indang tangatetba yimjak nung metetdaksütsüla mesüra pai inyakba mapa ajanga Aor kin tenüng menütsütsü, ta parnokisa metetdaksüo.

NCD ketdangpur shimba inyakim shitak inyaktsü atema onoki mepishir aser Naga nung ajak ajungtsü atema NCD-i tawa inyaksangshiba magizüksü ayongzüker ta Pomai Hoho, Dimapur tir K.A Jotham, Mao Hoho, Dimapur tir M. John Kape, Tangkhul Hoho, Dimapur tir Ayo Vashum, W/Chakhesang Hoho tir Z. Kepfelhou Kozas aser Rengma Public Organisation, Dimapur tir Wanhang nungertem ashi.

Indian Olympic contingent Tokyo nungi meyipa aruogo

New Delhi, August 9, 2021 (Agencies): Hombar anüingdang Tokyo Olympics nung shilem agiba India asayartem linük tonga aruogo.

Tayimtsü anendak nisung aika adenshir javelin throw gold-medal angur Neeraj Chopra dena asayartem pelaa agizük.

Iba mapang Sports Authority of India Director General Sandeep Pradhan-i anir teshimtet telok kati parnok pelaa agizük. Parnok den Athletics Federation of India president Adille Sumariwala liasü.

Hombarnü tayimtsü anendak kima nung Neeraj Chopra, wrestlers Ravi Kumar Dahiya o Bajrang Punia, boxer Lovlina Borgohain aser men's

hockey team pur pela agizüktsü atema nisung meyrjang adenshia liasü.

2012 London Games nung India-i medal 6 ngutet aser ibaji Olympic nung medal teimba anguba liasü saka taküm Tokyo Olympics nung India asayartem medal 7 nguteta otüsü tasen ka yangluogo.

Taküm Olympics asoshi India nung züngsem 228 agi akümba teshimtet telok yok. Iba nung asayar 120 dena liasü.

Weightlifter Mirabai Chanu-i Silver medal ka ngua India-i takok angutsü tenzük aser iba sülen August 8 nü Neeraj Chopra-i Men's Javelin Gold medal ngua tembang.

AKM-i Ao litsü nung alir ajak renema atatsü ayongzüker



Ao Kaketshir Mungdang ketdangsurtem Aug 9 nü parnok office nung Assam-Nagaland artsü tebilemstü dak sentakba nung osangbener senden ka akadang tangokba noksa nung angur. Mokokchung, August 9, 2021

Mokokchung, Aug 09 (TYO): Nagaland aser tanga northeast state-tem Assam den artsü tebilemstü adokba dak sentakba nung khuret süa bilemba onük kar Ao Kaketshir Mungdang (AKM) ketdangpurtemi Aug 9 nü parnok office nung osangbener senden ka metetdaksü.

Artsü tebilemstü dak sentakba nung mapang talangka AKM-i ola madoki ajemajema repranga ataogo. Assam-Nagaland artsü tebilemstü atema telok anaprongi

nentaka inyakba mangur. Nagaland sorkara state politics jara nung melii iba nungi atena reprangtsüla, kechiyong Assam tsütsü nungi mapang shia Nagaland-i ali atsüingda aruba atema tai tongloksüba ajangshia arur, ta AKM lenirtemisa metetdaksü.

Tatishitsü agi, AKM meyong reserve forest ka Aoküm nung lir aser ibaji Aor/Naga nung litsü nung lir, aji saka, Assam nungeri mapang shia AKM Reserve Forest nungji timtem agütsür, ta AKM

purisa kuli kar dena ashi.

Yaküm 2020 Feb ita nungto Assam nungeri AKM Reserve Forest nung kecha kuli makai Signboard intoktsü, anungji, tawato Reserve Forest nungji AKM-i signboard tasen ka inok, iba dak sentakba nung Assam media balala ajanga taitüsüba osang balala nguogo/züngshio, saka pei litsü nung yamaji inyakba atema kecha tarendaktsü mali aser AKM-i iba mapa ya tang tasen inyak masü, ta parnokisa jangjashitsü.

"Aor/Naga meyong ali inch kata shinga nema agütsütsü makok, ibaji akhi tsüraburtemi azü tenlaa alangzükba lir, anungji, kari danga aji raketsü merangra, AKM-i tatem tashi noktaksü renema lir", ta AKM lenirtemisa metetdaksü.

"Kodang kechi ataloktsüar ashitsü makok, anungji, Ao litsü nung alir senso ajak pei lima wazüka/kümzüka ayutsü asoshi renema atatsü sangoktsür", ta AKM lenirtemisa tayongzükba ka agütsü.

Dealer 18-i Nagaland sorkar nem Rs 19.64 crore tax magütsü

Kohima, August 9, 2021 (TYO): Nagaland ama senotsü tarulen maliba state ka nung sorkar senpong atema sen aruba inyakim rongnung tax agiba ya tongtipang lir saka April 2017 nungi 2019 tsüingda dealer 18-i Rs 19.64 crore tashi tax magütsü ta Comptroller Auditor General of India (CAG)-i metetdaksüo.

Dealer anati 'sales turnover' miimbang aser Rs 5.24 crore tashi Nagaland Value Added Tax (VAT) magütsü. Ano, dealer 16-i 'applicable taxable rate' miimbang aser Rs 14.40 crore VAT magütsü, ta CAG report nung shia lir.

September 2019 nung Superintendent of Taxes kübok record aliba repringdang M/S Gujarat Co-operative Milk Marketing Federation Ltd aser M/S Nestle India Ltd. ajanga 2013-18 tsüingda F7 (tax return) forms amshia tangalen nungi Rs 252.36 crore indang goods bener aruba shia lir. Superintendent of Taxes ya Assessing Authorities (AAs) lir, ta CAG-i ashi.

Dealer 2-i agütsüba returns ji AAs ajanga repringer agizük aser Rs 244.53 crore nungi Rs 29.34 crore tax angutsüba liasü. Dealer temi agütsüba Trading Accounts repringdang 13.25/14.50% tashi tax agitsü ajitet. Ajisüaka, dealer 2-i tax Rs 34.58 crore

agütsütsü melena Rs 29.34 crore agütsü aser iba jagi Rs 5.24 crore mangu, ta CAG-i metetdaksü.

Anungji, Nagaland Value Added Tax Rules, 2005 nung Rule 49 nung lateta aliba ama M/S Gujarat Co-operative Milk Marketing Federation Ltd aser M/S Nestle India Ltd. ajanga Nagaland sorkar nem Rs 5.24 crore aser Rs 5.15 crore penal interest agütsütsüla, ta CAG-i ashi.

March & July 2020 nung Department-i telangzüba agütsüba nung "November 2019 nung dealer ana nem show cause notice agütsü aser idangji M/s Gujarat Co-operative Milk Marketing Federation Ltd. ajanga mapang meshilok" ta ashi.

Department-isa October 2020 nung telangzüba agütsüba nung "M/s Nestle India Ltd-i parnoki ayokba products kar July 31, 2015 tashi 4.75% aser August 1, 2015 nungi 5% tax agitsüba lateta lir ta langzüo" ta shia liasü.

Ajisüaka, Department-i M/s Nestle India Ltd. ajanga tax tajemba agütsütsü ta ashibaji magizüker kechiyong dealer-i tangalen nungi bener aruba atema July 31, 2015 tashi 13.25% aser August 1, 2015 nungi 14.50% tax agitsüba lateta liasü, ta CAG-isa metetdaksü.

Iba jagi Rs 5.24 crore tax den penal interest meyipa angutsü atema inyaktsüla, ta parnokisa

metetdaksü.

September 2019 nung CAG-i Superintendent of Taxes indang assessment records repringdang C15 aser F16 forms amshia 2015-18 tashi dealer 16-i Rs 183.84 crore alizükba shia liasü. Dealer 16-i agütsüba returns ji AAs ajanga repringer agizük.

TAX soft - VAT e-Filing System nungi anguba invoice details ajanga dealer 16-i tax rates balala kübok Rs 183.84 crore alizük aser iba atema tax Rs 25.88 crore agütsütsüla. Ajisüaka, dealer temi agütsüba trading accounts nung parnoki Rs 176.47 crore indang alizük aser iba atema tax Rs 15.46 crore agütsütsüba liasü aser iba nungi parnoki Rs 11.47 crore dang agütsü aser Rs 3.99 crore magütsüba zülua lir.

Superintendent of Taxes-i returns shitak merepringdangba ajanga dealer 16-i tax Rs 10.42 crore magütsü, ta CAG-isa metetdaksü.

Nagaland VAT Rules, 2005 nung Rule 49 nung lateta aliba ama dealer 16-i tax miimbangba Rs 10.42 crore, tax liability Rs 3.99 crore aser penal interest Rs 11.41 crore densema Rs 25.82 crore agütsütsüla, ta CAG-isa metetdaksü.

Department-i audit agiba sülen Rs 26.89 lakh ngutetogo saka tax den penal interest densema Rs 25.82 crore meyipa angutsü atema mapa inyaktsüla, ta CAG-isa ashi.

NCOB Dimapur atema Rs 2 crore akoksatsür ka apu

Dimapur, August 9, 2021 (TYO): Uttar Pradesh kübok Gonda district nung alir Gyanendra Singh (26) ta ser nisung kati Nagaland Co-operative Bank Dimapur nem Rs 2 crore takosa bentsür aruba atema puogo.

2020-21 nung mejangjaba nisung kari bank balala indang ATM card ajanga 'chargeback claims' amshia Rs 2 crore tashi akoksatsüo ta NCOB Dimapur-i FIR benokba sülen Dimapur Police-i bushisingdanga arur Gyanendra

Singh puogo.

ACP 'C' Division-i ketdangtsü bushisingdanga arudang Gyanendra Singh-i linük nung bank balala aser talisa Chandigarh o Uttar Pradesh nung personal bank account balala lapokba bushitet.

Gyanendra-i bank account tem lapokba sülen Co-operative Bank Dimapur indang ATM nungi sen agizüktsü atema Dimapur-isa aru. Pai sen agizükba sülen tanga state temi ao aser parent bank branch dang false chargebacks ken o

benok. ATM nungi sen agizükdang, sen malu saka pa indang account nungi senbo katizük ta pai tiyazü shia ken o benoka liasü, ta Adl. Dy. Commissioner of Police/PRO, Dimapur-i sangdong ka nung metetdaksü.

Pa ket nungi Punjab National Bank aser SBI indang ATM card 6, Aadhar card aser flight ticket ka ngutetogo aser iba dak sendakba nung West Police Station, Dimapur nung FIR ka benokogo, ta Dimapur Police-isa ashi.

Tarnunger otsü shitepba nung Nusakholu Dawhuo-i temaba jenjang ngutet



(Abelen) Nagaland nung online ajanga mezüngbuba tarnunger otsü shitepba tetoktepba nung Nusakholu Dawhuo-i temaba jenjang ngutet aser (Achiji) Imnichetla Jamir-i tanabuba jenjang ngutetla nungertem noksa nung angur.

Kohima, Luroi/August 09 (TYO): Nagaland nung online ajanga mezüngbuba tarnunger otsü shitepba tetoktepba (folklore storytelling) nung Nusakholu Dawhuo (Love story of Dari & Rakhrülü) ajanga temaba jenjang ngutetogo. Iba sentong ya "Spreading wings to the untold Naga folklores" omen nung ajemdaker agia liasü aser takoker indang osang ya Hombar nikongdang sangdonga liasü.

Iba sentong ya Nagaland nungbo mezüngbuba alitsü, koba visual production house 'Naga Manu Production' ajanga ketdangüsü July 05 nungi August 9, 2021 tashi agia liasü.

Maneni iba tetoktepba nung Imnichetla Jamir (The Quest of Sarilungle) ajanga tanabuba jenjang nguteta liasü. Dawhuo aser Imnichetla na nem sen 6,000 aser 4,000 den e-certificate agütsütsü. Iba tetoktepba senpet sen ya Kuvelu Tetseo (Tetseo Sisters) ajanga agütsür alitsü.

Dawhuo indang tarnunger otsü ya anasatepa aliba yimtsüng ana, Chedema (Kohima district) aser Thenyizu (Phek district) tsüngta

meimtepba otsü ka lir.

Iba otsü ya ajanga nisung temang shi ya süa shisaa aotsü saka chichiba temeim aser adangchi tembar yimtetba bo teti alitsü, ta tetetzü ashir.

Imnichetla Jamir (The Quest of Sarilungle) otsü ya kinungbo aser kinungtsü na mapa meinyaki takum alitsü merangba aser yamaji alitsü asoshi lenmang bushidang mapang tajung süitemdaksüba indang alitsü.

Meranga inyakba aser pei inyaktetba nung tenük sünga aliba ajanga dang takum nung jangratema alitsü, ta iba otsü ya ajanga ashir.

Iba sentong ayonger ashiba agi, shilem agirtem ya tetendanger temi otsü ashiba yimya, tetetzü, creativity, shidakba atalokba asü masü aser otsü indang tetetzü amala nung ajemdaker tendanga liasü.

Tetendanger temi Rita Krocha, osangbener & Publisher, PenThrill Publication House; Alice Yhoshü, osangbener aser Kohima Press Club (KPC) tir aser Asonuo, News Editor, All India Radio (AIR), Kohima nungertem liasü.

Tarnunger otsü putu ka nungi putu ka nem angazükdakja

wazüka ayutsü nükjidong nung iba tetoktepba ya agia liasü, ta sentong ayongertemi sangdong ka ajanga ashi.

"Asen sobaliba aser yimsü-yimpong tanemi samaa aoba ajanga asen otsüla-oboula nung indang otsü tajung samar. Tarutsü putu asoshi tepang agi ashiba tarnunger otsü ya document ka ama wazüka ayutsü nükjidong nung iba sentong ya ayongzük," ta sangdong ajanga ashi.

Iba tetoktepba nung arishi küm pezü tanur, Menlei Phom (Folklore about an Owl and Shrew) nem ajakdang tanubutisang/tanutsütila sempet agütsü, koba Naroh Décor Kohima ajanga sponsor süa liasü, People's Choice award aser Best narrator (U-15) sempet ya Imsupongla Longchar (A tale of a mouse and a man) aser Judges choice award ya Aboli Wotsa (The Angel's wife) nem agüja liasü.

Iba sentong nung Nagaland kübok district balala nungi nisung 47-i shilem agi, kong tambutisang ya arishi küm 85 tain Thanso Yimchunger liasü tanubutisang ya arishi küm pezü tanur, Menlei Phom (Lankonthung) liasü

Nüburtem asoshi Indian Post tajungba akumtsü meranger

Dimapur, Luroi/August 09 (TYO): Yimdak-yimtsüngtem densema tesem ajunga nung nüburtemi nungdakba banking products, insurance, savings aser danga senotsü tsütsü service balala agütsütsü mechi Government of India ajanga postal department dang post office ajak nung nüburtem nem item services ya agütsütsü lemtetogo.

Post Master General, Northeast II Region Dimapur, Som Kamei-i ashiba agi, India nung Post Office ya lakh 1.5 dak tema lir aser Nagaland nunga Post Office ya 332 dak tema aser staff 800 dak tema lir, aser parnoki yimdak-yimtsüngtem tashinung postal services kisüng masü saka banking aser financial service tem dena kishizüng tonga oa agütsür.

Postal financial products nungya Post office saving bank account, Recurring Deposit account, Time Deposit account, Monthly Income Scheme (MIS) Account, Sukanya Samridhi Account (SSA) for Girl child, India Post Payments Bank (IPPB), Postal Life Insurance (PLI), Rural Postal Life Insurance (RPLI) amala

dena lir.

Department of post yagi tesem ajunga tongjemer asünung, 2018 küm IPPB ta ajaba doorstep banking tenzüka Aadhaar nung amendaker direct benefit transfer süteter.

Ibai yimtsüng nung customer indang kishizüng tashinung oa senotsü tsütateptsü atema yangluba digital platform ka lir. DOP ya UIDAI den sendaktep aser iba ya ajanga senotsü tsütateptsü aser banking services atema digital transaction amshiteter.

Northeast nung sorkar indang scheme balala teyari angurtem nem indang indanga agütsütsü asoshi Direct Benefit Transfer (DBT) ya amshir, ta PMG ajanga ashi.

Item scheme ya agiba mapang tetsüngtai dangar maitdaksütsü mechi yimdak-yimtsüngtem nung nüburtemi Department of Posts (DOP) nung bank account lapoka pei kishizüng tashinung banking service indang indanga agitetsü.

Account ka lapoka item service agitsü asoshi Aadhar den Phone Number dang nungdaker, aser sen ya indang indanga pei account-i

aitsü, ta ashi.

DOP ya USO (Universal Service Organization) kübok lir, anungji state nung tesem tatembangtiba tashinung nüburtem ajangzüksü nükjidong nung iba service ya agütsür.

Osettsüset belenshiba tsütsü postal service tajungba kumdaksütsü asoshi akok tashi meranga inyaker aser tashidak wara agi tesem ajunga sünger parcel service kata maliba mapanga inyaka liasü, ta Kamei-i ashi.

Taoba küm tashidak wara agi tesem ajunga sünger lia Nagaland nungi parcel tonne 10 shi danga tesemtemi yoka liasü, ta pai ashi.

Ano maneni Postal department ajanga CSC den sendakteper Aadhaar update, Pan card application, Passport application amala service tem agütsütsü, koba Nagaland nung teshimtet Post office tem nung yakta tenzütsü, ta ashi.

DOP nung metokmeperi aser timtem ajangshibatem bentet-ratetsü asoshi Toll free number-1800-2666-868 mesüra Post info App mesüra official website www.indiapost.gov.in nungi tongteprateptsü akok.

I-Day nung wako salatsü atema Minister/Advisor lemsaogo

Dimapur, Luroi/August 09 (TYO): Aruya aliba Independence Day (15th August, 2021) nung Minister/Advisor temi tesem balala nung National Flag (linük wako) sala

Rashtriya salute agitsü asoshi State sorkari Home Department ajanga lemsatsüogo.

Iba anogo Minister/Advisor tem oa sentong nung shilem agitsü tesem yamai alitsü:

S/No.	Name & Designation	Place
1.	Neiphiu Rio, Chief Minister	Kohima
2.	Yanthungo Patton, Deputy Chief Minister, Home, Roads & Bridges	Tuensang
3.	Sharingain Longkumer, Speaker, Nagaland Legislative Assembly	Longleng
4.	NeibaKronu, Minister, Planning & Coordination, Land Revenue & Parliamentary Affairs	Wokha
5.	S. Pangnyu Phom, Minister, Health & Family Welfare	Mon
6.	P. Paiwang Konyak, Minister, TPT, Land Resources	Mokokchung
7.	Jacob Zhimomi, Minister, PHE	Dimapur
8.	Tongpang Ozukum, Minister, Housing, Mechanical	Kiphire
9.	V. Kashiho Sangtam, Minister, Soil & Water Conservation, Geology & Mining	Noklak
10.	Temjen Imna Along, Minister, Higher Education & Tribal Affairs	Phek
11.	R. Khing, Advisor, Veterinary & Animal Husbandry, Women Resources Development	Peren
12.	Namri Nchang, Advisor, Water Resources	Tenning
13.	K.T. Sukhalu, Advisor, School Education	Zunheboto

Santsupen nungi temesepba mozü bena alir nisung ana apu



Dimapur, Luroi/August 09 (TYO): Women Police officer in-charge (OC), R. Lochumbeni Kikon ajanga sangdong ka nung ashiba agi, Santsupen area NH-61 nung MVCP aliba mapang Tata Sumo (registration number NL-05T-0397) ka anendakja mita bushia liasü.

Iba mapang gari nungi brown sugar/sunflower ta temolung melemtet aliba oset gram 240 (sunflower gram 46 aser brown sugar gram 194) nguteta liasü.

Iba dak sendakba nung OC-i aniba team ajanga ozüng alema temesepba mozü bena alir nisung ana apu. Pua alisang

nisung ana ya Wokha village nungi tang GHSS Colony, Wokha town nung alir Thungchamo'er jabaso arishi küm 34 tain Nchumthung Tungoe aser Koio village nungi tang kasa yimtsüng nung telidak Ponphyamo Kikon'er jabaso arishi küm 28 tain Yanrethung Kikon alitsü.

Iba dak sendakba nung Section 21 (b) NDPS Act R/W 34 IPC kübok Women Police Station, Wokha nung ken o ka benoka maneni asüngdanyatsü asoshi police ket nung tena ya yua lir, ta sangdong ajanga ashi.

GPRN/NSCN ajanga asükhu lemsatep

Dimapur, Luroi/August 09 (TYO): NSCN/GPRN indang Tatar, Elithung Odyuo mapang talangka shiranga arur anojungi August 8, 2021 asüba asoshi Government of the People's Republic of Nagalim (GPRN) ajanga mang ayimer. Pa ya Lotha Region kübok Riphyim yimtsüng nungi aser Naga lima tenzüka wadang nung 2004 küm February ita tenüng zülüoka liasü, ta NSCN/GPRN indang Ministry of Information and Publicity (MIP) sangdong ka ajanga ashi.

Pa tasünü tashi linük meimba molungsentü nung Naga lima tenzükogo. Pa asüba ajanga tawa adokba kanga jangja metetsü aser iba tawa asüngtsü

tasak alitsü. Pai anibelem mesasai Naga nung asoshi inyakba atema pa tenüng Naga nung puti otsü nung zülutsü aser mapang ajak nung bilemettsü, ta sangdong ajanga ashi.

NSCN/GPRN ajanga Asür Elithung Odyuo'er kinunger den asükhu lemsateper. Tulusang Tsüngremi mangyimer kibong nem anisüngzük agüjang ta sarasademtsür. Asür tanüla teti tatem taka tesunep nung anisüngzükjangma.

Asür Elithung Odyuo nem akum agüja August 9, 2021 nü Naga linük nisan tom nung atsüzük aser GRPN kübok office ajanga shibanga liasü, ta sangdong ajangasa ashi.

Pause Premiere Festival nung Assamese film 'Evening Gush' sayatsü



Guwahati, August 9, 2021 (Agencies): Mongolbarnü Pause Premiere Festival 2021 nung Assam nung film yanglur Xahid Khan indang Assamese short film - 'Evening Gush' sayatsü.

Iba sentong online ajanga ayongzüksü aser 6 PM (UK time), 12 PM (USA Central) aser 10:30 PM (IST) nungi tenzüka iba film indang link ghonda 24 tashi live angutsü, ta Khan-i ashi.

Iba film reprangtsü atema link ji- events.paus.tv/ EveningGush asütsü. Minute 7:23 talang film ya 'Suspense Drama' genre ka lir aser taküm iba film yanglua liasü.

"Ni ama tangar teyari magii film yanglurtem atema iba Premiere sentong ya kanga tongtibang aser kari dang iba film junga agizükra, parnoki taruba production atema film yanglur tem dang ashitsü akok aser iba telangzübaji onok atema kanga tajanzük asütsü," ta Khan-i ashi.

Iba film ya Sanjana Koch Khan-i produce süogo, shiba school tesayur ka lir. 2015 küm lai Xahid Khan deb longjemer 'Sand-The Love without Trust' film yangluogo aser 2016 küm Xahid Khan indang 'Alert-Condition: Red' produce sütsü.

Producer ka ama 'Evening Gush' ya Sanjana indang film tasembuba asütsü. Jureen Mahanta, shibai film nung

Madhuhmita Kashyap ama shilem agir, la ya Mass Communication of Asian Institute of Management and Technology indang kaketshir ka lir.

Assam nung Jureen ya stage drama artist takotet ka lir. 'Evening Gush' ya la indang film tanabuba asütsü. Tang, lai feature film ka nung shilem agidar, koba teyangludak lir, ta Khan-i metetdaksü.

Nilakshi Kalita, shibai Nilakshi Thakuria ama film nung shilem agir, la Gauhati University nungi Zoology nung postgraduate süogo.

National School of Drama alumni Rabijita Gogoi tawabangba kübok Jirsong Studio nungi Nilakshi-i acting nung diploma nguogo.

Rabijita Gogoi indang production house ajanga yangluba 'She' nung Nilakshi-i shilem agiogo aser Nexster atema lai web series 'Memories of an ant' nunga lai shilem agia lir.

Director aser screenplay dak alaka, Khan-i 'Evening Gush' otsü zülüja liasü.

'Evening Gush' nung tanga crew züngsem rongnung D.O.P - Prit Barua; Makeup - Patiyashi Bordoloi; Editing & Colour- Jitu Ray; Background Score - Bhaskar Medhi; Theme Music - Rupantor Puzari; Sound Design & Mixing - Jyoti Chetia; Assistant

Director & Lights - Hiru Borgohain; Still Photography - Rakesh Bharali aser Amir Shahnawaz - Production Control nung dena lir.

'Alert - Condition: Red' film atema nübur aikati film yanglur Khan jangjaa lir. 2015 küm Khan-i 'Sand-The Love without Trust' ta nungja agütsüba Hindi film ka mezüng yanglua liasü.

Khan indang tanabuba film 'Alert-Condition: Red' ya Academy Awards (OSCAR) Qualifying Film Festival 'Best of India Short Film Festival, Los Angles nung semifinalist liasü.

'Alert Condition: Red' atema Khan-i Best Films aser Best Directors award densema tanga award aika nguogo.

Khan indang tesübuba film - 'Mistake' ya Dadasaheb Phalke International Film Festival densema International, national aser regional film festival tem nung sayuogo aser 2019 küm Dubai nung ayonga agiba Emirates Short Film Festival nung best film award angu.

'Evening Gush' ya Khan indang film pungobuba asütsü. 2018 küm North East India's Person of The Year atema pai nomination angu aser Northeast Top 500 influential people indang list nung pa tenüng züngoka liasü.

2019 küm Khan-i India Star Icon Award ajanzüktet.

Meghalaya kübok Nongstoin nung auer dak kanga mejungi azük

Shillong, August 9, 2021 (Agencies): West Khasi Hills district kübok Nongstoin nung gari ka nungi stereo system auyatsü merang ama temolung melemi bilemba atema iba tesem nung alirtemi taochi mesayui lanur ka dak kanga mejungi azük.

Iba nisung yahi Nongstoin kübok District Transport Office (DTO) anasa anena yur aliba gari ka nungi stereo system auyatsü meranga liasü. Pa apuba sülen telok jagi züka merenshi.

Social media nung prokba video ka nung nisung kati lanur

dak süng agi azükba sayur. Social media sabang nung iba tatalokba indang video kanga prokshio.

Meghalaya police ketdangsürtemi ashiba agi, Nongstoin police station nung nisung dak azük telok anema FIR ka benokogo.

"Ozüng sülen manidaki nisungtemi pei mulongba ama inyaksangshiba atema Nongstoin PS nung FIR benoker. Junga mejangjateti pua alir ka merenshiba maparen nung parnoki shilem agi" ta AIGP G K Iangrai-ashi.

Mizoram nung nisung 281 dak Covid-19 putet



(Agencies): Hombarnü Mizoram nung nisung 281 dak Covid-19 putet. Taküm July 12 nungi shir ita ka jungnüa nung state nung COVID putetba rongnung iba ya tajemba asütsü.

Covid-19 puteter densema Mizoram nung nisung 44,520 dak Covid-19 putetogo aser parnok rongnung nisung 12,146 anepaludar, ta ketdangsür kati ashi.

Deobarnü Zoram Medical College (ZMC) nung sample tendangba maparen kecha meinyak asünung tashidak ajema putet, ta paisa ashi.

Tashidak puteter 281 rongnung, Rapid Antigen Test ajanga nisung 278 aser TrueNat laboratory nung nisung 3 dak Covid aliba putet.

Aizawl district nungi Covid-19 puteter timtiba asütsü. Iba

putet. Kasa mapang, Covid-19 puteter rongnung Kolasib district nungi nisung 29, Lunglei district nungi 27, Lawngtlai district nungi 19, Mamit district nungi 8 aser Champhai district nungi nisung 2 dena lir.

Hombarnü State nung tashidak tasen puteter rongnung tanur 61 dena lir. Tesüiba ghonda 24 tsüngda Mizoram nung iba tashidak agi nisung ka asü aser state nung iba wara adoker külen nungi nisung 168 süogo.

Tanü tashi Mizoram nung sample akh 6.81 dak tema tendangogo.

State immunization officer Dr. Lalzawmi-i, Honibarnü tashi nisung lakh 6.39 dak tema nem Covid-19 vaccine agütsüogo aser parnok rongnung nisung lakh 2 nem vaccine dose anaprongla agütsüogo.

ASTC nung mapa inyaker ka soset

Guwahati, August 9, 2021 (Agencies): Guwahati kübok Paltan Bazar nung aliba Assam State Transport Corporation (ASTC) indang office nung ASTC mapa inyaker ka soseta asü.

Iba nisungji Dhrubajyoti Thakuria ta jangjaogo aser pa ya Nalbari district kübok Tihu nungi liasü.

Pai Paltan Bazar nung aliba ATSC office indang generator room nung süngzü agi soset.

Paltan Bazar police station nungi police telok kati Thakuria indang mang agizükogo. Pa ya küm ana tashi ASTC nung inyaka aru.

Pa asüba kuli kecha memetet aser pa mang post-mortem asütsü atema bener ogo.

GOVERNMENT OF NAGALAND DIRECTORATE OF SCHOOL EDUCATION NAGALAND : : KOHIMA

NO.ED/SCH/RIMC/EE/2017-18

Dated, 9thAug 2021

ADVERTISEMENT

Advertisement for Admission to Class VIII in Rashtriya Indian Military College (RIMC), Dehradun, for July 2022 term to be conducted on 18th December 2021(Friday).

- Only boys are eligible to apply for admission to the RIMC, Dehradun. Candidates appearing for the above exam should not be less than 11 1/2 yrs (eleven and half) in age but should not have been attained the age of 13 yrs as on 01 July 2022 i.e. they should not be born earlier than 2nd July 2009 and not later than 1st January 2011.
- Candidates should either be studying in class VII or Pass Class VII from any recognised school at the time of admission to the RIMC i.e. 1st July 2022.
- The written part of the examination will consist of three papers namely Mathematics (0930-1100hrs), General Knowledge (1200-1300hrs) and English (1430-1630hrs) shall be conducted on 18th December 2021(Friday). The Oral interview will be intimated later for only those candidates who secure 50% mark in all the papers in the written Exam.
- Application form Cum Prospectus and booklet of old Question papers can be obtained from The Rastriya Indian Military College, GarhiCantt, Dehradun, Uttarakhand, Pin 248003, through online payment on RIMC website www.rimc.gov.in or speed post by forwarding self addressed slip and an account payee bank demand draft of Rs 600/- for General candidate and Rs 555/- for SC/ST candidates. The Demand Draft will be made in favour of THE COMMANDANT, RIMC DEHRADUN, DRAWEE BRANCH, STATE BANK OF INDIA, TEL BHAVAN, DEHRADUN,(BANK CODE -01576) UTTARKHAND.
- Application on prescribed form accompanied by 2 passport size photographs, Domicile certificate, Photocopy of Aadhar Card(both sides) Birth certificate issued by Municipal Corporation, ST/SC certificate and certificate from the Principal of the school in original and photograph on it attested stating date of birth and class studying, should reach the Directorate of School Education on or before 30thOctober 2021.

(SHANAVAS C)IAS
Principal Director

Issued by DIPR

GOVERNMENT OF NAGALAND DIRECTORATE OF TECHNICAL EDUCATION NAGALAND: KOHIMA NOTIFICATION

NO. DTE/ ESTT-2/02/2020-21/ This is to inform NSEE-2021 candidates who are yet to submit class-XII mark sheet are once again informed to submit the same to the office of the under-signed on or before 16th August, 2021 during office hours, failing to submit the same on time shall forfeit their candidature.

Sd/-

(NungsangmenIalmchen)

Ex-Officio Director.

Issued by DIPR



TIR YIMYIM YIMOBILEM (EDITORIAL)

DIMAPUR SANGTENNÜ, LUROI(AUGUST) 10, 2021

Lisopurtem anogo

Taküma asen lima nungbo alima lisopur anogo (International Day of World's Indigenous Peoples) memetetika süidaktsüogo. Atangji, takumbo alima nung tashidak wara tesashi aliba agi lokti adenshia sentong agitsü mapanga majung, ajisüaka asenokbo akhi nunga iba ama tongtibang alima anogo ya aikati süoki ia mamonger. United Nations sabang ajanga asenok ama ali kiburbo kibur saka pei lima nung bendanger ama kümer alirtem asoshi shimtetsüba anogoji iba alima lisopur anogomong ya lir. Iba anogomong ya küm shia August 9 nü amonger. Küm shia iba anogomong amongtsü UN sabang ajanga shimtetsüba nükjidongji, alima tesem balala nung lisopurbo lisopur ser nung tashitemetet aser rongsen akaba nung tangar memenepi alirtem jenjang repringhia ajungkettsütsü asoshi lir. Aji oda, iba anogo ya alima nung UN-i anir nisung ajaki lisopurtem nem akhüm agüja parnoka tesülen atüngzüka metoktsüi lokti nung libaliro aser inyakyim ajak nung kasasa tejakleni aotsüsa alima nung alir ajak nem tangatetba agüja amongba anogo lir. Iba tangatetba nung taküm 2021 küm alima lisopur anogomong omenjia " Shinga tesülen medoktsütsü : Lisopurtem aser lokti nung tesendaktep tasen ka nungdaker," ta shimteta lir. Atangji, koba linük nung südirsüaka lisopurtem mezüngoki bendangertemiang lisopurtem kümer aoba nung takoksa tulu ajurur. Lisopurtem asoshi parnoki jembiba oshi aser parnok aliba arem aser ayongtemji kanga tongtibang lir. Lisopurtem asoshi parnok oshiji medical aser engineering oshi, anungji kodang lisopurtem oshi samadir, iba denji parnoki arem nung ngutetba mozü aser nungjakoja ajak samadoker. Iba kasaji, kodang lisopurtem oshi samadir, iba denji külemi parnok kisüjensü aser inyaksangshi yimya aser nungjakojattem ajak samadoker. Ibaji dang masü saka bendangertem tesem balala nungi adenshia parnok kolok aser tashitemetet shisatsü amshia terenlok mapa inyak tenzükdang, lisopurtem lia aliba arem ajak lepdoktsür aser tzü mopong menentsüsa mapa tapu aika tenzüker. Iba jagi lisopurtem ajangzüker masü saka talidak dena maka kümdaktsür aser bendanger yimten kübok parnok nisunga masü ama teküpbok jenjang nung alir. Iba ama tia nung lisopurtem alima tesem aika nung timtemseta aliba repringteta UN-i küm shia parnokji yimten nung anioka telemtetba agiba sabang nung shilem agidaktsütsü aser rongsen amshibaren nunga parnok tajangzük angutsüsa temzüng ozüng nung enoka latettsü asoshi yimten shia nem takangba agüja amonger. Iba kasa takangbaji taküm 2021 küm lisopur anogomong omen nungjia shia lir. UN ajanga asadangtetba agi alima nung ya linük 90 shi nung lisopurtem ya million 476 dak tali lir. Ibaji alima nütsüng yongsük rangben nung shilem 6.2 shi asütsü. Item lisopur aliba linük 90 nung alirtem lisopurtemi beshiba sobaliba aser oshi tapu meyirijang ponggo dak tali lir. Itemji mesamadaktsüi tajungba küma wazüka ayutsü nungdakba den külemi lisopurtem, tanü ama alima wara den raraba mapang ya yimteni senzüka medoktsüi repringtsübaji kanga nungdaker. Alima tesem aika nung lisopurtem libaliro jenjang agi tangar memenep nungji, tanü ama tashidak wara agi nübortem amokmerendang, parnok aika teyari shitak mengui taküm melamelaa samar. Tanü nisung arishi asadanga nunga tangartem dang nungi lisopurtem ya arishi küma küm metsü agi tatsüba alir. Ibaji kodang asen lima nung asenok lisopurtem tia den medemdingdir, atangji, asenoki meteta aser memeteti asen lima nung akaba rongsen agi bendangertemang ajangzüker aser parnokang arishia talangba jangratema alir ta asenoki asadangtettsü. Atangji, asen lima nungbo government nung lisopurtemang lir, anungji lisopurtemi lisopurtem asoshi telemtetba agir. Ajisüaka, kodang telemtetbaji mapa küma inyaktsü tenzükdir, tenüngbo lisopur saka temoatsü aser tajangzük agizükertembo pi ta kümdaktsür. Asenok lisopurtem asoshi Delhi nungi aruba teyari aika Kolkata tashia tonga marudang samadoker. Aji oda, asen lima nung bendangeri asenok dang 'malik' ta ajar, aji lisopur asüba agi saka shitakba tagitsü aser temoatsü nung 'malik'jibo bendangertemji lir. Atangji, alima lisopurtem anogo nung ya alima ajaklen lisopurtem timtem nungi anitetsü aser yimten aser lokti nung shilem magiteti aliba agidaktsütsü asoshi jembir. Ajisüaka, alima shia lisopur tebilemetsü balala asütsü, anungji rongdak nungdaka balala asütsü. Iba tangatetba nung asenoka asenok timtem aser nungdak indang yimten aser lokti nung alima lisopurtem anogomong amongba mapang ya jembitsüla.

OLEMSABANG ELECTION ASER TAMANGER

~ Rev. Dr. Noklen Longkümer, Pastor Ungma

Alima yimüsüba menden yangluba nung tamangeri temerük aser ochi shisatsü agi tasü ita shilem agitsüla. Election nung dang masü mapang ajak nung tamanger ya Tsüngrem otongdar asütsüla. Nübur nem ali yimli indang Tsüngrem nükjidong tejangja rateta sayutsüaser memerükba kechisa lir, itemji Takoksang Tsüngrem tenüng nung atsütetsü, raksa-a samatsütsü aser meküptokja ali yimli ajak madak tematibaiyimsü asür ta kintem rongnung metetdaktetsü tanü tamanger mapa ta angateta tamangeri yimden nung shilem agitsü kanga tongtipang, kechiaser ali yimli ya Tsüngrem nübur asoshi lir. Tamangeri teti senso ajungtsü asoshi inyaktsüla. Alima yimden yangluba nung tamangeri shilem agiba ajanga nübur tanela jenjang indaktsür, kechiaser tamanger asoshi ibai tamajung tashitem anema tanela tongpang lir. Nübur masü pei juri ajangzüksü inyaksangshiba mapatem anema tasü ita nokdaktetsüsa tamangeri Tsüngrem O dang tashi anga-a tamang tongpang raratsüla. Tanishir shimdang Tsüngrem tsüngken tsübuba, nübur meimba, ochi aser teindang jakla akar shimba tetezü tamangeri nübur ajak ajangzüksütsüsa yimden yangluba nung shilem agiba lir.

Nübur yimden tetetzü :

Nübur mulungba ama parnok ajanga parnok asoshi yangluba yimten. Nüburtem jenjang temabai ajungkettsüsa mangdang tejangja akar, nübur meimba, pei-sasa pei taküm anishitetba sensotem shima tashi agüja nungloksütsü tajungtiba mapang election ya lir. Election nung ibala ama tangatetba nung shilem magitetra, MLA-temi ochi-mashi anema ola madoktsü, nübur ola mangatsü, aser nübur asoshi teimla masü tebilem dang asütsü. 2016 küm tatemlen State Angh (Governor-i) ashi ama Nagaland nung yimsüsürji shitakba meimchir-rogo asütsüla (pei achi ajemtsü dang metetba shirururogo masütsüla). Aji ta mesüra nübur nungdak balala - lenmang tajung, mozü ki tajung, shisaliok reju tajung, tangar atoksa-a yimtsüng nübur libaliro ajungkettsüindang mangdang tejangja akar malitsü. Ibaji tanga kuli agi masü tamangeri ochi aser temerük shisatsüagi election nung shilem magitetba ajanga asütsü. Tekümdang aser Tsüngrem tsübuba senso-i teti nübur ajangzüksüsa yimsüsür shimba nung tasü ita shilem agitetter, saka tema mesüra tazütsü tamanger asoshi election mapang ya aritepba rongsen dang ngurbo Lai tesayuba anema inyakyonga oda election mapangbo tim dang ta mashi angateta pei Khristan taküm jakla samadaktsüba ngua aruogo.

Lenir shimba nung tamanger shilem :

Nagaland nung talisa 1969 general election sülen nungi ochimashi, süpokrem agizüka pei temeden yoka achiba jabujari aser tesempatsütapu ajak inyaka aru aser 2014 general election vote agütsüba (polling day) anogo tashi nungbo amangbapurtemi küm pungo atema pei senmang ajak yoka chir-ang polling day tembangdaktetsü. Anungji shiri sen talang agi nübur temeden alia sorkar küma lir, tanüparnoki parnok atema dang inyakba ya tim dang lir. Parnok anema jembitsu, aitsutsu, metongshitsü joko nübur dak temeden makai kümago. Tanü tejashitsüka, amangbapur asoshi election mapang ya Isak chir tambosang Esau-i chiausy kayong pei tambu senmang yoka achiba den saku lir. Election mapang tamangeri rongsen mechi Tsüngrem meshi-meshia amatokba ya tejashitsüka lir. Lokti tulu-tila tebandang mali pai/lai aniba lokti tashi amshia election matongdang miima nübur temeden ajak yoka chir, polling box anasai nübur shinga marutsüta tashiyim amshia amokmerenbato tamangeri Tsüngrem melen rongsen shimba süngjang lir. Iba ajanga tanü Nagaland nung nokdaka aliba Sorkar ya nübur tenzüksü atema masü election mapang tamanger indang temeden alizükdang intokba sen meyipba angutsü, tanaben market nung tayoktsünangdena aliba osettem ama tamanger aser senso ka temeden yokshir alizüktetsüsa akok tashi State development fund tila kata jenshia moyoki rizüngtetba ya kechiba ta süngmangtsü kuli mangur. Kechiaser tanü Nagaland legislative Assembly ya nübur nungdak balala atema jembidak sabang masü, saka pei jenjang tajungba yanglushidak sabang lir. Tejangja kuli kaji tesüiba küm minute 15 tsüngda parnok libaliro tali ajungketa kümdaktsüba temzüng menurema renemer senshibato-a ka lir. Aji dang masü parnoki nübur ola mangaba aser item amala aika angur.

Tanü Nagaland nung anogoshia osang kaketem tapak tongma-ka Sorkari nübur ajangzüksü atema masü, saka nübur ola anema telemtetba takang agiba ajanga tai maker taküm laludakja State ajunga intensive care unit (ICU) jenjang nung toktsüba ama, Sorkar tenzüker nem ita sen mapang shitak nung magütsüba, mid-day meal tim mesüi amshiba, State vigilance commission tashi ajemtsüba, anogo atemzüka sorkar amokmerenba osang-tsüsang dak alaka nübur atema teimla osang kecha mangur. Oh, amangbapurtem, iba ama tia ya koda kongi nungi? Tamangertemi tanü ajung asa- tebang ulura lapoka tagidak makaba o jembia inyakba süngjangto masü no? Item ya tansütsü sür tang arua aliba election mapang yabo tamanger ajaki Tsüngrem den teraksa yanglushia temulung temerük agi shitakba taginüba nübu shima temelenshi bener arutsü teimla nung Tsüngremi agüja aliba temeten senyong meyoki lenir shimba nung shilem agitettsüsa asoshi tangatetba kar lemsateper:

Ali yimli tashi ajak Tsüngrem nungi :

Ali yimli tashi ajak Tsüngrem nungi aser yimsüsüba bangdak ya Tsüngremi latettsüba lir. Anungji yimsüsür shiri mapa tajung inyaker parnok asoshi tetsübuttsü mali, kechiaser nübur ajungtsü atema mapa tajung inyaktsü yimsüsürji Tsüngrem tenzüker lir. Item dak alaka linük ozüng anema apusor, aibelener merenshitsu paji Tsüngremi shimtet. Anungji yimsüsüba bangdak anema inyakertemji Tsüngrem anemer lir. Tsüngremi latettsüba ali yimli yimsüsür nem nübur alimelen agütsür. Tsüngrem tenzükertertem ama yimsüsürtemi nübur ajungtsü asoshi inyaker. Saka yimsüsür shiri Tsüngrem O-i melaba ama mesüi mapa tamajung inyaker parnokjibo tetsübuttsü (Rom 13:1-7). Tia maka tanü amangbapuri shimba yimsüsür dak nübur meraket mangur aser par tenüng masanger, kechiaser parnoki parnok mena aliba menden nungi nübur asoshi tajung inyaktsü melen parnok ajungtsü dang inyakba anema ajaklen nungi nübur ola adoker aser item angshia parnok tsübua aliba ya lir.

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

France nung Rwanda nung refugee kati Khristan putir ka tepset



Putir, Olivier Maire (abelen) aser Emmanuel Abayisenga na noksa nung angur.

August 09, 2021: France nung Khristan putir ka tepsetba ken o nung police-i Rwanda nung refugee ka puogo.

Yaküm France yimtiba, Paris nung Nantes Cathedral nung mi senoktsüba ken o dak sendakba nung arrshi küm 40, Emmanuel Abayisenga apu, saka chioker lia pai putir, Olivier Maire tepsetba nangzükogo.

"Pa (Emmanuel) tepuokdak nungi chiokba sülen arrshi küm 60 putiri par Arogo nung pa agizüka liasü," ta osang ka ajanga metetdaksü.

"Pa judicial kübok liasü aser Saint-Laurent-sur-Sèvre nung telidak liasü. Hombarnepai putir tepsetba sülen pai pasasa police dangi ao," ta kasa osang ajanga

metetdaksü.

Abayisenga ya Catholic Khristan ka lir aser putir Olivier-i pa agizüka pa nem chiyungtsü aser talidak agüja liasü.

Hombarnü (August 9) putir tepsetba sülen French Interior Minister, Gerald Darmanin-i twitter ajanga, "Vendée region nung putir ka tepsetba sülen ni asen linük nung Catholic Khristantem pusemstsü nangzüküker," ta metetdaksü.

Yaküm July 18 nü Gothic Nantes Tenla kidang mi senoktsüba aibelen-a Emmanuel Abayisenga-i nangzüküka liasü. Pa apuba sülen chiok saka judicial kübok liasü. Tetezü pa France adener tanga linüki meyoktsü atema pa indang passport meshia ayu.

2019 küm Paris nung aliba Notre-Dame Tenla ki rongdokba sülen ita 15 dang lir Gothic Nantes Tenla ki nunga mi senokja liasü. Ghonda ana sülen ang Nante Tenla ki arongba mi ensepteta liasü, ibayongji Tenla ki meshimeshia merongdok saka 1621 küm nungi iba Tenla kidang aliba nungtugu kongki (organ) bo rongdoka liasü.

France nung tekülem sentong tagidak mapang Jacques Hamel tepsetba sülen küm pezü lir tang putir, Olivier Maire tepseter.

2016 küm July ita nung arrshi küm 85, Hamel leniba nung Saint-Étienne-du-Rouvray Tenla kidang tekülem sentong tagidak mapang nung Islamic kiralongrar anati pa tepseta liasü.

ICC-i Myanmar nung timtemer pastor tem aika yariogo

August 09, 0221: Myanmar linük nung Khristantem ya minority lir, ajisüaka Karen ethnic group nungi nütüsing timbaka Khristantem lir. Karen ethnic group kübok Poe Karen Baptist Convention (PKBC) ya Karen Baptist Convention kübok independent telok ka lir; tang coronavirus wara mapang nung Khristantem aika timtemba mapang nung International Christian Concern (ICC)-i pastor tem nem teyari agütsüogo.

PKBC seminaries nung staff tem tesüiba küm ka dak tema itasen mangu, aser takümbo tensa tajungba akümstsü, ta imlaa liasü saka saka wara mesüngjamba agi tenzükertem kibong aika timtemer.

Taküm February 1 nü nungi tenzüküka Myanmar nung sepai yimsüsüba kübok ano timtem

tuluba ajangshiba sülen PKBC-i alima linüktem dang nungi teyari meshitsü lemteta liasü.

ICC nungi senotsü teyari anguba sülen PKBC headquarters-i tesem balala nung teyari agütsü. Arogo lenirtemi Khristantem nem jang, totzü, pia, ango takong aser menjang densema chiyungtsü tapu balala aika lema agütsüogo.

Tawa ICC dang nungi teyari angutsü züngsema aliba pastor anabo süadokogo, saka tanünga pastor 91-ibo teyari nguogo.

PKBC ajanga ICC dang nungi teyari angur organizations aser nija aikati ICC dang pelaba lemsatepogo.

PKBC-ia shidi ka ajanga ICC dang, "Onoki June 25, 2021 nü ozü tembar ajanga nenok dang nungi senotsü teyari nguogo. Nenok nungi

anguba teyari ajanga onoki Khristan pastor 91 nem chiyungtsü agütsüogo," ta metetdakja parnok dang pelaba lemsatep.

Rev. Nyein Tun Aung-i ICC dang, "Ozü linük nung COVID-19 wara aser sepaitem yimsüsüba ajanga ozü nüburttem kanga timtemer. Tang ama tensa mapang ka nung International Christian Concern-i onok yaria chiyungtsü agütsüogo. COVID-19 wara koktettsü aser sepaitemi yimsüsüba anentsü atema sarasademdaksüner. Tenla ki aika nung tekülem agiba anenogo aser Arogo züngsemtemi anogo shia timtem ajurur. Tenla kitem tanaben lapoka Tsüngrem külemtettsü atema sarasademjang. Onoki International Christian Concern dang kanga pelar," ta metetdaksü.

ANOGO ABEN TSÜNGREM DEN

Asenok jungkai adokba ajanga alir

Kong ainkar sayutsüngi mali, nüburtesoetba mali saka shibai ozüng beshir pa temoatsüba.
A. Shin 29:18.

Alimaji mangdang agi anir. Tsüngremer nüburtjungkai adokba ajanga alir. Alimai nükjitung aser alizüng atongtsü bushir. Nüburttemi tulutiba aser jangratemtsü temulung asütsü bushir koba asoshi parnoki parnok taküm yutsür. Institutionsi alizüng ayur aser ibaji tongtettsü asoshi parnoki tentet tentetter. Tsüngremer nüburi leman balaka nungi inyaker. Khristantem parnok taküm Tsüngrem jungkai adokba nung yanglur. Asenok tarutsü taküm asoshi kechi tajungtiba asütsü ta bilemer ta Tsüngremi asenok tebilemba masüngdang. Pai asen nungdak metetta kar. Tsüngremi asenok nungi aginübaji Pai Pa mulungjang nung aliba jungkai adoktsüba aser asenok asoshi Pai mulungba kechi lir iba nung asenoki temulung agütsüdaktsüner, kechiaser Tsüngremer lemanngtemji asenok lemanngtem masü! (Isa. 58:8-9).

Kodangsa nüburi pei taküm Tsüngremer jungkai adokba mamendaklir parnoki tazükba ajak magizüküker. Iba tetezü parnok nükdang kechi junger ta bilemer aji inyaker. Parnoki parnok alizüng ayur, parnok nungdaktem yanglur aser Tsüngrem dang moajang ta sarasademmer. Khristan karbo Tsüngrem nungi talangka pilar alir aji saka parnoki sarasademtsü jangrar aser Tsüngrem dang parnoki merangba nung moajang ta asüngdang!

Na asoshi Tsüngremi mulungba lemanngmetettsübaji Pai ne dang jungkai adoktsübaji dang lir. Nai ibaji nai mulungba lemanngnung kodanga mangutsü mesüra memetettsü. Kodang nai Tebu dang angashir, indangyongjisa ne taküm asoshi mapa kar: tashi angaba. Apijemtsü Shin züluri ashiba ama: "Shibai ozüng ayur pa tepelatsü."

Vote ayokba mesüra aliba ya temenen: NBCC

Kohima, August 09 nükjidong nung NBCC-i Clean Election campaign ya tenzüküker. (Agencies): Nagaland Baptist Church Council (NBCC)-i, Clean Election Movement state nung Arogo ajaki vote convenor, Dr. Villo Naleo-i, ayokba mesüra aliba ya election inyakim melenshitsü temenen ta ola adoka nükjidong nung NBCC-i iba sangdongtsüla, ta metetdaksü. mapatong tenzüküker, ta ashi.

August 6, 2021 nü "Clean Election Movement Nagaland Baptist Church Council (NBCC) aser Angami Baptist Church Council (ABCC)-i ayongzüküka 'Clean Election Movement: My Vote, My Future' mapatong tenzüküba sentong nung jembidang NBCC-i iba osang ya sangoktsü.

NBCC platinum hall, Kohima nung ayongzüküba sentong nung jembidang NBCC general secretary, Rev Zelhoh Keyho-i, Arogoitemi temenen mapatem metsübur, anungji Arogoitemi election mapang tesempatsü mapatem ya temenen, ta ola adoka shitettsüla, ta metetdaksü.

Kodang Arogoi iba ya temenen, ta shidir Naga nung melungjang nung tetsübu alir, anungji vote ya meimchir ka temeden lir, aser iba temeden yoka achibaji temenen ta Arogoitemi shitettsüla, ta paisa metetdaksü.

2023 küm state nung Assembly election agitsü, aser iba election merüka agitettsü

Nagaland nung Khristan ajak atema teinyaktsü shilem ka südaktsütsüla," ta paisa shisem.

Yimjung atema inyaker, Niketu Iralu-i, rongsenkettsüng aintsü aser loktiliba tajungba akümstsü nükjidong nung NBCC-i temelungtetba tulu nung iba mapatong tenzüküker, ta ashi.

Paisa, NBCC kübok Arogo ajaki counselling mesüra advisory cells tentettsüla, aser item tentet shia nung tetsürtebur asem-pezü shima Arogo tenüng nung election dak sendakba ola adoktsü asoshi mapa lemsüktsütsüla, ta ashi.

Iba sentong tembanga anküp o jembidang ABCC executive director, Rev Atsi Dolie-i, election merükteta agitsü atema raratsü tetemtsü, ta Arogoi angateta inyaktsüla, ta ashi.

Iba ya tenük agi manguba tongbang ka lir, anungji ajaki iba tongbang nung nokdaksüla, ta paisa ayongzük.

OLONG PAITEP # 5901

	1			2	3				
4			5					6	
					7				
	8								
	9		10			11			
					12			13	
14									
					15				
		16							

TIPIEN		LANGTSÜNGLEN	
2. Sü jeplok	- (4)	1. _ _ _ _ i	- (4)
4. O agi merenshi	- (5)	3. Kasa masü	- (6)
7. Ayongküm li	- (5)	5. Nüchi masü	- (5)
8. Chiyungtsü mapang süiadok	- (4)	6. Tashi endok	- (5)
9. Tsüngrem den jembiba	- (9)	9. Langtem	- (5)
12. Saklok	- (4)	10. Anü malidang	- (6)
14. Samaba mebushitet	- (5)	11. _ _ _ _ _ kibur	- (5)
15. Mejanga onü	- (5)	13. Tebur tembar tsüngda	- (4)
16. Tzü shiruru ka	- (4)	jatepba	- (4)

OLONG PAITEP # 5900 TELANGZÜBA

TIPIEN :	LANGTSÜNGLEN :
2. Pongsen, 5. Lepko, 7. Omen,	1. Alimang, 2. Pongen, 3. Samaru,
8. Maongka, 10. Yangkhu,	4. Nün, 6. Pio, 9. Nüngdak, 10. Yongya,
12. Senpong, 14. Angu, 15. Raksa,	11. Kongro, 13. Ora, 14. Ata.
16. Arameso,	



ALOKBAI DOCTOR KANGA SÜNGMANGDAKTSÜ

Alokba : Ohiiii...Doctor-ba...Ni tepoklang nungi tenzüker temolongbang tashi atua kecha ashitsüla masü.... Angoba agi aonunga amoua mooteti kanga tim-atemer aja.

Doctor : Koa...Mejangangjo...Na tepok shitak odar sudi...??? Natzü-a shitak anar sudi ???

Alokba : Sir...Ni Scu-a shitak tang kozür.... Natzü-a shitak tang anar....Ajak tik-tak danga.

Doctor : Adjaaa...Surabang tan hopta tsüngda ya Scu tila-ka aser Natzü ishika bener arung. Iba nungjagi ni ne tashidakji tendangdi....Ajiser-ang mozü-bo agütsüdi.

Alokba : Hai Doctor-ba...Salema...Nai ashiba ama ni Scu o Natzü-tu bentsür aru-a ya hiiii.

Doctor : Doctor-bai tashitakji tendang nung...Tesungmangtsü sayatenya mapa ka atalok...!!! Nu Menden nung komo lir ta adok... Arreee !!! Kodaser tebur dak Nu Menden alitsü !!!??? Ya Machine tai asü Alokba tai...!!!??? Hai Alokba...Nai Scü o Natzü bentsür aruba- tu... Nai kozüba Scü aser nai anaba Natzü bentsür aruba masü-a naaa...???

Alokba : Sir...!!! Tai tokang ni kü indang Scü o Natzü bendentsü amaa-adokji.... Joko aritepa ozü Mim Saheb-la indang bentsür aru adiiii... Sir imlibilema kü dang tai tokang.

Doctor : Ooooooh...!!!!!! Alokba Nai sayangtetogo nooo.

~ Lilir : L. Kika Pongener.

AO OSHI ANGAZÜKDAK:

TANÜ ANGAZÜKTSÜBA OJANG



Kobateka

(adv) koda tulu ta asüngdangba (how big ?)

* Ango tulutibaji **kobateka** liasü ?

Kodaka


(adv) kechi koda aser komala ta asüngdangba (what and how ?)

* **Kodaka** Tsüngremi ni meim, ne ashitsü makok.

NAI-A YA METETTER MA?

AMAZON PRIME NUNG SAYUTSÜ ALIBA MOVIE ASER SERIES KAR: AUGUST 2021

- The Lincoln Lawyer
- Ghostbusters (1984)
- Ghostbusters II
- The Green Hornet
- The Taking of Pelham 1 2 3
- Tyler Perry's The Family That Preys
- Waiting to Exhale
- Here We Go Again: Season 1 (ALLBLK)
- How the Earth Was Made: Season 1 (History Vault)
- In Their Own Words: Season 1 (PBS Documentaries)
- Sea Raiders: Season 1 (Best TV Ever)
- The Bridge: Season 1 (Topic)
- The Nordic Murders: Season 1 (PBS Masterpiece)
- 100% Wolf: Legend of the Moonstone: Season 1
- EVANGELION: 3.0+1.01 THRICE UPON A TIME (Amazon Exclusive)
- Modern Love: Season 2 (Amazon Original Series)



TANÜBO NAI LANGZÜANG

Q. Koba ministry ajanga India nung Kala Sanskriti Vikas Yojana tenzük?

A.Ministry of Culture

B.Ministry of Commerce

C.Ministry of Health

D.Ministry of Education

(Taruba adok nung onoki langzüksü)

YASHI ADOK TELANGZÜBA : 2019

SUDOKU # 5941

TELANGZUBA # 5940

1				6		4	5	4	9	7	8	2	5	6	3	1	
9	2		5				3	1	1	6	2	9	7	3	8	4	5
	4	8							8	5	3	6	1	4	7	2	9
7				9		1			2	7	1	4	5	6	9	8	3
				8		9			6	8	4	2	3	9	1	5	7
				2	5			7	5	3	9	1	8	7	2	6	4
6	5					9	3	1	3	2	5	7	6	1	4	9	8
3				1			5		7	4	6	5	9	8	3	1	2
		4					6	2	9	1	8	3	4	2	5	7	6

OJANG LUTEP # 5486

LOTEK :

NGNU :

ANKGA :

SHISAA :

URSAY :

UAAR :

OKKIP :

NGBNUO :

AJEMAJEMA :

DOKÜMAK :

OJANG LUTEP TELANGZÜBA # 5485

TASÜNGDANGBA ARUDANG TENÜK TEMULUNG DANG MASÜNGDANGI TELANGZÜBA AGÜTSÜRA SÜNGJEMA MELITETTSÜ

TAN HOPTA ATEMA - KOMA SÜLA ?

Q. ABAM kübok arogotem nung sannükertem ya ABAM-i dang shimer mapang mapang shia, government mapa inyakertem amato, mapang apir arogo balalai transfer and posting yoka tenzükdaksü nunga koma süla ?

Defence Ministry-i NSO group den senotsü magütsütep: Ajay Bhatt

New Delhi, August 09 (Agencies): Hombarnü Defence Ministry-i, parnoki Israel nung NSO group den senotsü kecha magütsütep, ta metetdaksü.

Israel nung NSO indang Pegasus spyware amshia India nung phone ajanga tongtibang senso aika itdangitogo ta osang prokba sülen mangatetep tulu adoka lir.

Hombarnü Rajya Sabha senden nung tasüngdangba ka langzudang Minister of State for defence, Ajay Bhatt-i, "Ministry of

Defence-i NSO Group Technologies den senotsü kecha magütsütep," ta metetdaksü.

Sorkari NSO Group Technologies den senotsü agütsüteper asü?, ta asüngdanga liasü.

NSO Group-i ashiba agi, kiralongra anema raratsü atema dang parnoki linük sorkartem dang Pegasus ayoker, ta metetdaksüogo.


Tang tzungluruwa mongpu Parliament nung opposition party temi sorkar aija Pegasus ken o nung o lemteptsü akhanger, ajisüaka

sorkari iba ya tongtibang onük ka masü, ta shiogo.

Taoba ita International media ajanga Pegasus spyware amshia linük balala nung phone ajanga itdangitba osang ka sangdonga liasü. NSO indang database leak asüba list nungji India nunga Rahul Gandhi densema opposition lenirtem, union minister ana - Prahlad Singh Patel aser railways & IT minister Ashwini Vaishnav, bussinessman Anil Ambani, taoba mapang CBI tongti ka aser osangbener 40 densema lir.



August 09, 2021 nü Jhargram district nung International Day of the World's Indigenous Peoples amongdang West Bengal Chief Minister, Mamata Banerjee-i tribal nisungtem den tsüngsangba noksa nung angur.



“ उज्वला एक योजना भर नहीं है, बल्कि यह करोड़ों महिलाओं को चूल्हे के धुएं से मुक्ति दिला कर उनके जीवन में सकारात्मक बदलाव लाने का एक प्रभावी माध्यम बनी है। उज्वला से जहां उन्हें स्वच्छ व सुरक्षित ईंधन की सहूलियत मिली है, वहीं उनके स्वास्थ्य की रक्षा की दिशा में भी इस योजना ने महत्वपूर्ण योगदान दिया है। ”
- नरेन्द्र मोदी



धुएं की लाचारी नहीं, जीवन हुआ आसान
उज्वला ने दिया स्वच्छ ईंधन और मुस्कान

उज्वला 2.0 से एक करोड़ और जरूरतमंद
महिलाओं को मुफ्त रसोई गैस कनेक्शन

उज्वला 2.0

- प्रधानमंत्री उज्वला योजना के तहत 8 करोड़ मुफ्त एलपीजी कनेक्शन देने का लक्ष्य तय समय के पहले हुआ पूरा। अब उज्वला 2.0 के तहत 1 करोड़ और मुफ्त गैस कनेक्शन
- उज्वला 2.0 के तहत लाभार्थियों को मुफ्त गैस कनेक्शन, मुफ्त स्टोव और मुफ्त पहली एलपीजी रिफिल
- योजना में SECC परिवार, SC/ST परिवार, अति पिछड़ा वर्ग आदि श्रेणियां सम्मिलित
- पहचान व पते के प्रमाण के लिए आधार कार्ड ही पर्याप्त
- प्रवासी परिवार को केवल स्व-घोषणा पत्र के आधार पर मुफ्त रसोई गैस कनेक्शन
- पोर्टल pmuy.gov.in पर आवेदन करने का विकल्प

उज्वला 2.0

का शुभारंभ
नरेन्द्र मोदी
प्रधानमंत्री
के कर-कमलों द्वारा

(वीडियो कांफ्रेंसिंग के माध्यम से)

गरिमामथी उपस्थिति

योगी आदित्यनाथ
मुख्यमंत्री
उत्तर प्रदेश

हरदीप सिंह पुरी
केंद्रीय पेट्रोलियम एवं प्राकृतिक गैस
तथा आवास और शहरी मामले मंत्री

केशव प्रसाद मौर्य
उप मुख्यमंत्री
उत्तर प्रदेश

डॉ. दिनेश शर्मा
उप मुख्यमंत्री
उत्तर प्रदेश

रामेश्वर तेली
केंद्रीय पेट्रोलियम एवं प्राकृतिक गैस
तथा श्रम और रोजगार राज्य मंत्री

10 अगस्त 2021, दोपहर 12.30 बजे
महोबा, उत्तर प्रदेश

कार्यक्रम के सीधे प्रसारण से जुड़ें
<https://pmindiawebcast.nic.in>



DAVP 33101/13/0001/2122

Opposition telongjem ya khenpiga atema dang masü: Jairam Ramesh

New Delhi, August 09 (Agencies): Interview ka nung jembidang Congress lenir, Jairam Ramesh-i, opposition party tem telongjem ya khenpiga atema dang masü, ta metetdaksü.

Interview ka nung pa dang, opposition telongjem ya Parliament nung dang asü mesüra iba telongjemi tarutsü nung BJP anema lokteptsü? ta asüngdanga liasü.

"Tang Parliament nung opposition telongjem ajanga Parliament adener-a kasa tangatetba aliba sayur. Iba ya tangatetba kasa aliba party tem longjemba lir, ajisüaka tang tashi nungbo iba ya teloktep ka masü. Item party temi lenirtem jenjang nung o lemteptogo aser anaben tashi Ato kilonser nem Covid aser aluyimba ozüing dak sendakba temepishiba shidi ana agütsüogo. Election matongdang lokteptsü atemabo lenirtem jenjang nung maparen aika adoktsü. Iba ya ajanga telongjem ka tenteter. Lenirtem senden ana nung Rahul Gandhi denogo aser pai-a senden ka ayongzüka menogo. Rahul lenisüba nung longjemer onük balala süoka o lemteptogo," ta Jairam Ramesh-i metetdaksü.

Ano tasüngdangba ka langzudang Rajya Sabha MP, Jairam Ramesh-i, "Onoki Assam aser Kerala na nung sorkar akümtsü imlaa liasü aser Bengal nung menden ka danga mangutsü tabo bilema maliasü. Onoki tamakok nungi ajemdaker tangazükba akatsüla. Congress-i Chhattisgarh, Madhya Pradesh aser Rajasthan elections nung BJP madak takok nguogo aser Jharkhand, Gujarat, Haryana nung onok jenjang junga lir. 2014 küm election nung onoki takok mangu aser 2019 küm election nung tamakok mejungi angu. Iba ya party saaksalemtsü mapang," ta metetdaksü.

Tanga tasüngdangba ka langzudang pai, "Linük nung Narendra Modi aser BJP sorkar atsüngdoktsü atema opposition longjema lir, ajisüaka tali tashi itshitsü atema asalentong tajung yanglur inyaktsüla," ta metetdaksü.



Kunduz, Afghanistan nung Taliban aser Afghan security forces tsungta raraba sülen Kunduz yimti tiyong nung Taliban indang nisan ka songa aliba noksa nung angur. Taliban teloki Afghanistan north tsütsü Kunduz province indang yimti tesem timba Deobarnü tashinung agiogo, aser item tesemtem rongnung governor indang office, police headquarters dena lir, ta osang ajanga ashi.

Delta variant mechi China nung COVID-19 cases timba akumer

Beijing, Luroi/August 09 (Agencies): Hombarnü China nung COVID-19 tashidak nisung tali dak putet, aser iba tashidak menatepa aoba nokdangtsü mechi yimti aika nung nübur ajunga tendang tenzükogo.

July 20 nungi tenzüka kanga mela menatepa aoba Delta variant ya yimti ter dak tema nung puteta arur aser ketdangsurtemi yimti balala nung sorkar dang tashidak tsüngsü aputsü aser inyakyim nung tapok adokba adangtsü totuyuba agütsü.

"Tekolok aser temolungsentsü anüalema malitsüla," ta National Health Commission (NHC) ajanga Deobarnü ashi.

Taoba küm COVID-19 tashidak wara poktetba sülen China nung iba tashidak ya kanga junga azüokteta aru, aser tang Delta variant ya tetendangba tulu ka amai aikati ashir, saka rongsen laluaka ketdangsurtemi iba tabu ya azüoktsü imlar.

Iba virus madak takok angutsü aser azüoktsü asoshi mozü agiba aser talenba balala benokba meyütsütsüla, ta taoba mapang health minister inyaka

alisang Gap Qiang-i ashi. "Alima tesem ajunga nung iba virus ya ali tashi, dangalen nungi iba virus bener aruba nokdangtsü asoshi China-i sentong tesashi yanglua amshiba memelenshitsüla," ta Gao-i sorkari busemba People's Daily osangkaket nung zülutsü.

Akok tashi tekeratiba nung virus ya bushiteta azüoktsü nükjidong yur China-i iba tashidak menatepa aoba süngzü rakdangtsü asoshi inyaksüla, ta pai ashi.

Yimti balala nung sorkari iba virus prokshia aoba nokdangtsü asoshi mapa junga meinyakba ajanga Nanjing, Yantai, Zhengzhou aser Zhangjiajie amala yimtitem nungi ketdangsur kar mapa nungi anendaktsüogo.

China nung Deobarnü nisung tasen 125 dak COVID-19 jangjatetba rongnung cases 94 bo yangji menatepa aoba lir. Honibarnü nisung 96 dak iba tashidak putet aser item rongnung cases 81 yangji menatepa aoba aser tanüngba ya bendanglen nungi menar aruba lir, ta NHC ajanga Hombarnü ashi.

Deobarnü puteter ya timba Zhengzhou aser Yangzhou yimti

nungi liasü. Yangzhou nung ponguben buba nübur ajunga tendangba maparen tenzükogo, ta yimti ketdangsurtemi Hombarnü ashi, aser kasa anogo ya Zhengzhou nung asemen buba tendangba tembangtsü imlar.

Wuhan yimti, kong COVID-19 tashidak wara ya 2019 küm tatemlen mezüngbuba puteta liasü, yangji Deobarnü nisung ana dak iba virus ya putet, koba August 2 nü yangji menatepa aoba Delta variant mezüngbuba puteter anogoshi putetyonga aruba nung tajemtiba alitsü.

Wuhan yimti ajungalen iba tashidak tendang tenzük saka iba tashidak mazüokteti prokshia aoba meliasü, ta yimti nung aliba Tongji mozüki nungi doctor kati Deobarnü ashi.

China nung COVID-19 tashidak putetaka temang nung timtem magütsür nisung 39 lir aser parnoki item amalaji COVID-19 cases ta mezüngshir.

China nung iba tashidak wara tenzük tang tashinung nisung 93,826 menepa lir aser iba virus agi asüba nisung 4,636 lir.

Mali nung jihadists temi nisung 40 dak tema tepset

Bamako, Luroi/August 09 (Agencies): Niger den arrtsü nung Mali anütoktiplen jihadists temi yimtsüng asem maka nisung 40 dak tema tepsetogo, ta military officer ka aser local ketdangsurtemi Hombarnü metetdaksü.

"Deobarnü Karou, Ouatagouna aser Daoutegeft yimtsüng nung kiralongrartemi civilian 40 dak tema tepsetogo," ta ketdangsur kati AFP dang ashi.

"Kiralongrartem yimtsüngi

ai aser yimdaklirtem ajak tepset," ta paisa ashi.

Kasa mapang nung local ketdangsur kati, "Karou nung civilian 20 tepset. Ouatagouna nung civilian 14 aser Daoutegeft nunga civilian tem tepsetogo," ta ashi.

Mali ya Africa anüolen Sahel tesem nung aliba sensaker linük ka lir aser iba linük nung 2012 kü nungi tenzüka kiralongrartem den raraa arudar.

Mepetmesü ya linük

anütoktiplen tenzük aser iba sülen Mali nung kanga longsoa aliba linük teyongtsüleni prokshia ao aser kidanger Niger aser Burkina Faso-ia prokshia ao.

Al-Qaeda aser Islamic State group den sendaktepa aliba telungpur telok tem kübok linük nung telungpurtemi timtem lendong bener arutsü.

Tang tashi nung civilian aser sepaitem meyirejang aika süogo aser nisung meyirejang aika pei ki toktsür jenshiaogo.

Bangladesh nung Hindu nunger tekulem ki pezü amak

Dhaka, Luroi/August 09 (Agencies): Bangladesh kübok Khulna district nung aliba Hindu nungertem indang dokan kar aser tekulem ki pezü ta ozüng alema nisung telok kati raksatsüogo. Iba tatalokba sülen police temi nisung 10 puogo aser security akangshitsüogo, ta media sangdong ka ajanga metetdaksü.

Iba tatalokba ya Honibarnü Rupsha Upazila kübok Shiali yimtsüng nung Hindu nunger aser Muslim nungertem tsüngda Hokolbar aonung mangatetep adokba sülen ataloka liasü, ta Dhaka Tribune sangdong ka ajanga metetdaksü. Iba tesem nung alirtemi ashiba agi, samesa nisung telok ka yagi mezüng Shiali Mahasmashan temple amak. Parnoki temple nung süngyanglu aser nisung arondak raksatsü.

Iba sülen parnok Shiali Purbapara tesemi ao aser idakji Hari Mandir, Durga Mandir aser the Govinda Mandir nung Hindu nunger tsüngrem süngyanglutem raksatsü. Maneni Hindu nunger indang dokan trok aser ki ana item nisungtem yagi raksatsü, ta kasa sangdong ajanga metetdaksü.

Rupsha Upazila Puja Udjapan Parishad, general secretary Krishna Gopal Sen-i, temple pezü amakba mapang

süngyanglu 10 raksatsüogo, ta ashi. Iba tesem nung tang tensa kanga mejungi lir. Ajisüaka local administration-i tensa azüoka ayutsü atema takok tashi inyakdar, ta Sen-isa ashi.

Local nisungtem kari ashiba agi, temple amakertem ya kidanger Sheikhpara, Bamandanga aser Chadpur tesem nungi liasü. Ajisüaka parnok maitüsü mejangja. Temple amakba sülen tensa mejungi kümogo aser temzüng ozüng azüoktsü atema iba tesemi police talila yokogo, ta Rupsha police station Officer-in-Charge Sardar Mosharrif Hossain-i ashi.

"Tensa azüoktsü atema onok kanga kümüküka lir," ta Hossain-i ashi. Esha sarasadem mapang agia aliba mapang Hindu nungertem Shiali Mahasmashan temple leni kirtan ken tenyonga ao. Iba ajanga mangatetep adok, ta local mosque indang Imam Maulana Nazim Uddin-i ashi.

Sarasadem mapang agiba mapang mosque anasa ken teten ta ni mepeshiba sülen nisung kati ni nongoktsü aser iba ajanga mangatetep tali adok. Ajisüaka police aruba sülen mangatetep adoker aliba bentet, ta pai ashi. Kasa mapang nung Hindu nungertem rongnung kati danga Imam menongoktsü, ta Sen-i ashi.

Southwest Pakistan bomb lendong nung police ana asü

Quetta, Luroi/August 09 (Agencies): Pakistan southwest tsütsü Balochistan yimtiba, Quetta nung bomb tesashi ka apokba lendong nung police ana asü aser 20 shi yiru, ta ketdangsurtemi ashi.

"Quetta bomb lendong nung police ana asü," ta Balochistan sorkar atema odongtar, Liaquat Shahwani-i Deobarnü sangdong ka nung ashi.

Ano police 12 densema nisung 21 yiru, ta provincial health department indang odongtar Wasim Baig-i ashi.

Iba lendong nung yirurtem ya yimti nung aliba Civil Hospital-i anir ogo, ta police tanishir kati ashi.

Serena Hotel anasa Tanzeem Square nung aliba police mobile van ka dak tenük yoker bomb pokloktsüba lendong nungya iba tesem ajanga aor nisung pezü yiru, ta Shahwani-i ashi.

Bomb ya motorcycle ka nung inokja liasü aser police tem sünga mena aliba van anasa apok, aser iba mapang anasa aliba ki nung kijiba indang aina jaksatsü, ta yangji alir police

ketdangsur kati ashi.

Tang tashi iba lendong agütsüba asoshi telok katia tenüng agia mali.

Sepaitemi iba tesem ya lungbangogo aser mapa tamajung inyaker aputsü bushiba mapang lir, ta Shahwani-i ashi.

Balochistan ya Afghanistan aser Iran den arütsüa lir, aser ibai Pakistan indang province tulutiba aser tamajungtiba lir.

Iba province nungya telungpur telok balala lir, aser item rongnung Taliban, Shia Muslim nunger dak tenük yoker tentetba Sunni nunger telungpur aser iba province nüjiso bushiba telok tem lir.

China-i Xinjiang province nungi Balochistan ajanga Gulf of Oman tashi gari aser train lenmang agi sendakteptsü asoshi maparen tenzüka lir, aser aikati iba maparen mechi sorkar anemertemi azüdokshir, ta ashir.

Ozüng amshiba telok balala aser danga province nungi arua China-i sen billion \$62 indoka inyakba project nung inyaker dak tenük yoker Balochistan nung azüdokshiba ya teti ajangshir.

Zunheboto nung Coffee Bar lapokogo



Zunheboto, Luroi/August 09, 2021: District Project Office, Department of Land Resources, Zunheboto nung DC Peter Lichamo-i coffee bar lapoktsüba mapang tangokba noksa ka yangi angur.

Zunheboto, Luroi/August 09, 2021 (TYO): Hokolbarnü (06.08.2021), District Project Office, Department of Land Resources, Zunheboto nung kanga dang yongya ataba coffee bar lapoktsüogo. Alakteta tejaoker ama, Deputy Commissioner Zunheboto, Peter Lichamo-i iba coffee bar lapoktsüba den külemi coffee menünga machine lema agütsü, koba department ajanga ayongzüka liasü, ta sangdong ka ajanga metetdaksü.

DC-i ashiba agi, Zunheboto District nung Coffee tajung tsünütetsüsa, Coffee lu ayimer aika lir aser alima tesem balala nung anguba coffee tajungba den district nungi adokba coffee yagi tokteptsü akok, ta pai shisem.

Iba mapatong achaayanga takok ngua inyakba aser

tajangzük angutsüpurtem nem coffee pulper machine lema agütsüba atema Lichamo-i Department of Land Resources dang pelaba metetdaksü.

Zunheboto jila kübok market tesem nunga Coffee bar ka yakta lapoktsütsü, ta DC-isa ashi.

District Land Resources Officer, Vikugha Kiba-i, 2017 küm Zunheboto kübok yimtsüing 65 nung coffee lu ayimtsü indang maparen metetpeladaksüba indang yimdangi arua telok den lemsatepa liasü aser tang Nagaland nung adokba coffee international market tongtettsüsa inyaktetba angudang pelar, ta pai ashi.

Zunheboto district nung aluyimertemi (coffee lu ayimertem) pei kisüing ajangzüksü tebilemba nung

meinyaker, saka rongsenketzüng tsütsü temelenshi adokdaksütsü aser coffee tsünüba ajanga lanurtem pei sasa inyaka aazüksü nükla yur aluyimertemi coffee lu ayimer, ta Kiba-i ashi.

Zunheboto nung coffee tsünütsü atema ali hectare lakh 1.86 shi lir aser coffee takok ngua tsünütetra, aluyimertem tanga teyari menüngdaksü aser iba luyim ajanga parnok kaa ita aser peria dang alitsü, ta pai pai ashi.

Department ajanga aluyimer nem tsünüsebongtsü atemba/yokba osettsüset balala lakh 23 shi lema agütsüogo aser coffee dang masü saka Nagaland nungi adokba tanga chiyongtsü tem alia achitsü/ajemtsü asoshi department-i maparen balala inyaksü sentong lir, ta Kiba-i shisem.

Pelaba Lemsateper

TASOBA – 10 March 1935 ~ TASÜBA – 04 August 2021

Onoki teti meima aliba Asür **Aokumba** (mongsenyimti) akumli tembangba mapang alima nong tetsubutsü wara tesashi liaka ozü den shirnoki sa nübo, rongsen, shisatsü aser sarasadem agi yariogo nenok dangi tsüngdong arua meshiaka ajak dang kangasa pelaba lemsateper. Tsüngremi nenok kija kibong ajak tsüngremi moajangma.

Temiem kinungtsü, Chimur aser semchirsemmur



NPBCA MISSION CENTRE NUNG AUGUST 07, 2021 NÜ NPBCAWD-i NAGALAND POLICE DANG TEMEIM SAYUA "DAILY GUIDE" SAYAOGO

Self Reliant Project atema NPBCAWD ajanga adokba "Daily Guide" kaket ka NPBCA Conference Hall, Mission Centre, Chumukedima nung August 7, 2021 nü Nagaland Police Family Welfare Association tir, **Wt. Meysangla-i** sayatsü, koba Nagaland Police nem bendanga agüja liasü.

Iba sentong nung Wt. Pusuinla Longkumer, Women Secretary menden liasü; Wt. Maya Metha, Women Evangelist ajanga sarasadem; Wt. Atula Imti Ben, SRP Convenor ajanga o jemb; NPBCA indang Executive Secretary, Rev. Dr. H.A. Zhimomi-i Daily Guide meshiteta sarasademsü; Wt. Ruokuozeu Martha-i tepela anküp o jemb aser Wt. Anshely Sumi-i tatem sarasadem agi.

OFFICE OF THE UNGMA BAPTIST AROGO LAISHIR TELONGJEM TENÜNGSANG AGÜTSÜR

Dr. Imnabenla Jamirtsür D/o Mr. Marlepden Jamir aser Lt. Nukshimenla Lkr. Senate of Serampore University kübok, Christian Ethics nung Ungmatsür rongnung mezüngbuba Doctorate ngutetba atema UBALT ajanga tenüngsang agütsüba lemsateper. La indang Dissertation, "Towards a relevant sexual ethics for India: Indian Church's engagement with homophobia with special reference to the work of the National Council of Churches" nungi zülua kanga dang takok tulu ngutet. Sensosanger ajak asoshi aser talisa Ungma Laishir tem asoshi konang nüngsang tulu bener arutsüba atema UBALT office ajanga pelaba lemsateper. Tsüngremi Pa wadang asoshi ne sempet tali amshiangma ta asen Laishir sarasadem.

Sd/- Mr. Nokzenketba Jamir President (UBALT)

Sd/- Mr. Moatemsü Jamir Secretary (UBALT)

In the Court of Principal District & Sessions Judge Mokokchung : Nagaland

S/C NO. 134/2021

NOTICE

NOTICE INVITING CLAIMS/OBJECTIONS OF OTHER CLAIMANT(S) FOR ISSUE OF SUCCESSION CERTIFICATE UNDER PART-1 OF INDIAN SUCCESSION ACT 1925

Whereas application under Succession Act 1925 for grant of Succession Certificate for the estate/pension benefits of Late Limaangla has been applied by Shri. Imtituba H/o Lt. Limaangla, R/o H.No. 1 FAC Compus, Mkg. Nagaland for possession of:

GPF, GIS, Gratuity, Leave encashment, Pension etc. Closing of A/C. Notice is hereby given that any person having interest in the administration of the estate/pension benefits of the said deceased may if she/he so desire appear in this court on or before the said day of 29.8.2021

Given under the hand and seal of the court on this the 29.7.2021

Sd/- Principal District & Sessions Judge Mokokchung: Nagaland

Wokha nung vaccination drive ayongzük



Wokha, Luroi/August 09, 2021: Medical Department den District Administration longjemer Wokha jila kübok tesem balala nung Covid-19 Vaccination Drive achaayanga agiba mapang tangokba noksa ka yangi angur.

Wokha, Luroi/August 09, 2021 (TYO): District Task Force for COVID-19 Wokha ajanga lemtetba ama, Honibarnü (07.08.2021) Medical Department den District Administration longjemer Wokha jila kübok tesem 14 nung special COVID-19 vaccination drive ayonga agiogo, ta sangdong ajanga metetdaksü.

Iba drive agiba mapang, COVID-19 antigen status metetnürtem atema Rapid Antigen Test (RAT) agia liasü.

Tesem balala lemsar vaccination session agiba mapang, team-i matamabensar, tekolok meshitak alirtem aser temang nung timtem balala aliba ajanga vaccine agiba tesem

tashi maruteti alir tantsür - tambur tem anepalua yariogo.

Iba special vaccination drive mapang, nisung 329 nem vaccine agütsüogo aser Mt. Tiyi Hall, Wokha town nung nisung 20 shi Covid atema tendang, saka parnok indang sample ajak negative liasü. Tsüngsang mopung mejungaka, iba anogo nübur aikati tangatetba tulu nung aruagi vaccine agiogo.

Sentong renemba ama, iba Vaccination Drive takok ngua agitetba atema, Chief Medical Officer, Wokha, Dr. C.W. Tungoe-i, Deputy Commissioner den Wokha District Task Force züngsem, health care workers, frontline workers, colony council

chairman/council züngsemtem aser and medical staff ajak dang pelaba metetdaksü, ta kasa sangdong nung shia lir.



Shisalen sayur temi jiru tsünüba, menti den legume (kolar, luli etc) külemi yokba aser ninang metsüba yimyattem sayuogo. Iba den külemi, KCC Loan aser kisan call centre indang aluyimertem dang metetdaksü. Iba training sülen, New Vongti yimtsüing nung Pineapple Farm school aser FSG lapokja liasü. Training nung adenertem külemi tangokba noksa ka yangi angur.

Kiphire, Luroi/August 09, 2021: Pungro aser New vongti yimtsüing nung August 4 nungi 5, 2021 tashi ATMA Kiphire, Pungro Block ajanga training sentong ayonga agiogo. Iba training nung Yamuki BTT Convenor aser Asa Tep ATM Pungro block na shisalen sayur liasü.



Tokyo Olympics 2020 tembangba sülen Olympics gold medalist Neeraj Chopra meyipa aruba mapang IGI Airport, New Delhi nung agizükba noksa nung angur.

Olympics ayongertemi nisung 28 dak Covid potetba metetdaksü

Tokyo, Luroi/August 9 (Agencies): Tokyo Olympics ayongertemi Hombarnü sangdong ka ajanga nisung 28 dak COVID-19 tashidak potetba metetdaksüogo, ajisüaka tashidak menartem rongnung asayar ka danga densema maliasü. 32buba Olympics asayaba mapang, ajak senteper nisung 458 dak tashidak potetba sangdonga liasü.

Tang tashidak menartem rongnung nisung 13 contractor tem, asaya dak sendaka aliba nisung trok, volunteers trok, Tokyo employees ana aser media nungi ka densema lir. Japan nung alir nisung 307

dak tashidak potetba jangjaogo. Asaya tenzükba mapang nungi tatembang tashi nung asayar 29 densema nisung 458 dak coronavirus tashidak poteta liasü.

Asayamung dak sendaka aliba ketdangsür 115 dak COVID tashidak potetogo aser kasa mapang nung contractor 249 dak tashidak poteta liasü.

Maneni media dak sendaka aliba nisung 26, employees 12 aser volunteers 27 daka tashidak potetogo.

Iba asayamung nung shilem agitsü atema bendanger 42711 Japan-i arua liasü.

Alima ajunga wara agi

sünger liaka Tokyo nung Olympic kanga takok ngua asayaogo, koba Deobar aonung asayamung shibangba sentong ka kanga meraketa agia tembangogo.

Linüktem rongnung USA-i medal (gold 39) timba angu aser tanabuba jenjang nung China (38) liasü. Kasa mapang nung Japan-ia otsü tasen ka yanglua medal 27 angu aser parnok tasembuba jenjang nung asayamung tembang.

Iba asayamung nung India team-ia taoba mapang dang nungi tajungba asaya medal tenet ngutetogo, kong gold ka, silver ana aser bronze pezü densema lir.

India tebur Football Team August 15 nungi Camp tenzüksü

Luroi/August 9, 2021 (Agencies): India tebur football team August 15 nü nungi Kolkata nung camp tenzüksü. September ita international friendly asayatsü aliba dak rangloker camp akatsü. Ajisüaka tetsür football team camp dak sendakba nung osang kecha mali, shirnok taruba küm asayamung ayongzükba linük ama AFC Asian Cup nung asayatsü lir. India tetsür football tema April ita nungi tang tashi nung khen danga asayaa mali aser Indian Women's League dena thitsüba sülen parnok terenemshiba kecha mali.

Tebur football team nung asayatem aser staff tem ajak August 15 nü adenshitsu, saka training session bo tasungnü nungiang tenzüksü. Saudi Arabia den FIFA World Cup qualifier asayatsü lia National team tatemsa Kolkata nung 2006 küm camp ka agia liasü. Iba camp ya bio-bubble ka kübok wara dak sendakba nung

tetuyuba agütsür aliba sülen anidaka agitsü. Team nung asayar aser staff tem mapang shia tashidak tendanga alitsü.

Tebur national team head coach Igor Stimac-i asayar 23 tenüng sangdongogo. Ajisüaka Maldives nung AFC Cup asayatsü aliba ajanga ATK Mohun Bagan aser Bengaluru FC nungi asayatem camp tetenzük nungi shilem magitetsü. Club anaprongla nungi asayatem iba asayamung nung shilem agiba sülen camp nung arua adentsü.

Head Coach Igor Stimac-i ashiba agi, "asayatem den ajurutepa taruba asayatem atema külemi renemshitsu kanga pelaa bilemer. India nungi club anapronglai AFC Cup nung kanga junga asayatsü imlaja atar. Kasa mapang nung tanungba asayatem arua maden tsüngda camp nung shilem agitsü asoshi asayar tajungtiba shimtsü atema asayatem asadangsü nungdaker."

Camp nung shilem agitsü

aliba asayatem:

Goalkeeper: Dheeraj Singh Moirangthem, Vishal Kaith.

Defender: Ashish Rai, Seriton Fernandes, Adil Khan, Chinglensana Singh, Narender, Rahul Bheke, Akash Mishra, Mandar Rao Dessai.

Midfielder: Lalengmawia, Glan Martins, Jeakson Singh, Anirudh Thapa, Brandon Fernandes, Sahal Abdul Samad, Halicharan Narzary, Bipin Singh, Yasir Mohammed.

Forward: Rahul KP, Farukh Choudhary, Ishan Pandita, Rahim Ali.

Camp nung shilem agitsü aliba ATK Mohun Bagan aser Bengaluru FC nungi asayatem: Goalkeeper: Amrinder Singh, Gurpreet Singh Sandhu.

Defender: Pritam Kotal, Ashutosh Mehta, Sandesh Jhingan, Subhasish Bose.

Midfielder: Udanta Singh, Pronay Halder, Suresh Singh Wangjam, Ashqie Kuruniyan.

Forward: Liston Colaco, Manvir Singh, Sunil Chhetri.

India o England na mezüngbuba Test draw nung tembang

Luroi/August 9, 2021 (Agencies): India aser England na tsüngda mezüngbuba Test asaya tzünglu aruba ajanga anogo pongububa masayateti draw nung tembangogo.

Test asaya anogo pongububa nung asaya akoktsü atema India team-i run 157 nungdaka liasü aser akoktsü timla tulu liasü, ajisüaka tzünglu agi asaya raksatsü aser team ana point lemdangtsüsa aküm.

World Test Championship cycle tasenba kübok India aser England team napronglai point pezüzü nguogo.

Tsüingsang majungba ajanga maximum over 450 asayatsü aliba nungi over 250 dang asayaa liasü. Tatembangbuba inning nung asaya akoktsü atema India team-i run 209 nungdaka liasü aser anogo pezünübuba tembangba tashi nung parnoki over 14 nung asayar ka out ser run 52 yanglur liasü.

Cricket asaya nung kechiang atalokja memetet saka Virat

Kohli-i aniba team-i asaya koka point 12 prongla angutsü timla liasü.

England team asoshi India nem run 209 meyangludaktsüi asayatsüji melarabo mesüla, saka tsüingsang majungba ajanga bowler tem nem seam aser swing tajungba ontettsü atema maongka agütsüla.

KL Rahul, shibai mezüngbuba innings nung run 84 yanglua liasü, pai ashiba agi, pitch masayatetsüsabo masü asü saka run angutsü tasak süla.

Mezüngbuba test asaya draw nung tembangba sülen England aser India na tanabuba Test Lord's Cricket Ground, London nung August 13 nü nungi tenzüksü aser iba sülen tasembuba Test August 26 nü nungi Emerald Headingley nung asayatsü. Maneni Test pezübuba The Kia Oval, London nung September 3 nü nungi asayatsü aser pongububa Emirates Old Trafford, Manchester nung September 11 nü nungi tenzükka asayatsü.

Shishilembar kati Sreejesh nem sen crore 1 agütsütsü nangzük



i bronze medal nguteta asayaba nung Goalkeeper PR Sreejesh-i kanga tongtibang shilem agiogo. Pai team nem teyari agütsüba atema onoki pa nem tenüngsang agütsür aser pa nem sen crore 1 senpet agütsütsü lemetetba pelashishia sangdonger," ta VPS Healthcare Chairman & Managing Director, Dr Shamsheer Vayalil-i tweet asü.

Luroi/August 9, 2021 (Agencies): Gulf nung amenoker aliba India nung shishilembar kati Hombarnü India hockey team goalkeeper P R Sreejesh nem sen crore ka senpet agütsütsü nangzükogo. Tokyo Olympics nung India nung Sreejesh-i tongtibang shilem agia liasü.

"Olympics nung India team-

India hockey team-i küm 41 sülen Olympics nung medal ka kokteta Tokyo Olympics nung otsü tasen ka yangluogo. August 5 nü Germany den bronze medal atema asaya India team-i goal 5-4 agi koka liasü.

Goal 5-4 agi tejekdang ser asayaba mapang asaya tembangtsü second trok anunga lia penaltycorner ka mena, saka Sreejesh aser defence-i ball kanga junga nokdanga takok angu.

Denmark Masters: Ponnappa aser Reddy na tanabuba jenjang nung tembang

Luroi/August 9, 2021 (Agencies): India tsürtem rongnungi badminton asayar Ashwini Ponnappa aser N Sikki Reddy na Denmark Masters tetsür tarep final asaya nung top seeds Denmark tsür Amalie Magelund aser Freja Ravn nati kokogo.

Final asaya nung Ashwini Ponnappa aser N Sikki Reddy nati mezüngbuba game bo akok saka tanungba game ana mekokteti 21-15 19-21 14-21 agi Magelund aser Freja na

nem asaya kokdaksü.

Kasa asayamung nung India nung rongnungi Lakshya Sen tebur kija asaya semifinal nung France nung asayar Christo Popov-i tsükdaktsü aser tarep asaya nung Chirag Sen o Subhankar Dey nata quarter-final nung tsükatok.

Tetsür kija asayatem rongnungi Aakarshi Kashyap-i tajungtiba asaya ajisüaka la semifinal nung Dane Julie Dawall Jakobsen-i tsükdaktsü.

BILEMDANGANG

"Na tang jajaa aliba lenmang mejungra tanga ka mesapokang."